

「代書詩一百韻、寄微之」白居易

甲

憶在貞元歲、初登典校司。身名同日授、心事一言知。
肺腑都無隔、形骸兩不羈。疎狂屬年少、閑散爲官卑。
分定金蘭契、言通藥石規。交賢方汲汲、友直每憇憇。
有月多同賞、無盃不共持。秋風拂琴匣、夜雪卷書帷。
高上慈恩塔、幽尋皇子陂。唐昌玉蘂會、崇敬牡丹期。
笑勸迂辛酒、閑吟短李詩。儒風愛敦質、佛理賞玄師。
度日曾無悶、通宵靡不爲。雙聲聯律句、八面對宮基。
往往遊三省、騰騰出九逵。寒銷直城路、春到曲江池。
樹暖枝條弱、山晴彩翠奇。峯攢石綠點、柳宛麴塵絲。
岸草煙鋪地、園花雪壓枝。早光紅照耀、新溜碧逶迤。
幄幕侵堤布、盤筵占地施。徵伶皆絕藝、選妓悉名姬。
鉛黛凝春態、金鈿耀水嬉。風流誇墜髻、時世鬪啼眉。
密坐隨歡促、華樽逐勝移。香飄歌袂動、翠落舞釵遺。
籌插紅螺椀、觥飛白玉卮。打嫌調笑易、飲訝卷波遲。
殘席諠譁散、歸鞍酩酊騎。酡顏烏帽側、醉袖玉鞭垂。